

Majikan perlu pengesahan JIM untuk gajikan PATI secara sah

SHAH ALAM - Majikan yang berhasrat menggajikan pendatang asing tanpa izin (PATI) di bawah Program Rekalibrasi Tenaga Kerja diminta mendapatkan pengesahan Jabatan Imigresen Malaysia (JIM) terlebih dahulu.

Kementerian Sumber Manusia (KSM) dalam satu kenyataan semalam berkata, pengesahan tersebut perlu dilakukan sebelum majikan membuat permohonan perakuan rekalibrasi dengan Jabatan Tenaga Kerja Semenanjung Malaysia (JTKSM).

Menurut KSM, program itu untuk meregularisasikan PATI yang ada dalam negara sebagai pekerja asing yang sah.

“Menteri Dalam Negeri, Datuk Seri Hamzah Zainudin telah mengumumkan pelaksanaan Pelan Rekalibrasi PATI dengan kerjasama strategik KSM.

“Pelan Rekalibrasi PATI ini membabitkan dua komponen utama program khas iaitu Program Rekalibrasi Pulang dan Program Rekalibrasi Tenaga Kerja.

“KSM menerusi JTKSM terlibat dalam melaksanakan Program Rekalibrasi Tenaga Kerja,” kata kenyataan itu semalam.

Mengulas lanjut KSM berkata, permohonan perakuan rekalibrasi di JTKSM boleh dibuat secara dalam talian menerusi Sistem Pengurusan Pekerja Asing Bersepadu (ePPAx) di www.eppax.gov.my mulai 16 November ini.